

Акафист
святым благоверным князю Петру и
княгине Февронии, Муромским
чудотворцам

Память празднуем 8 июля (25 июня)

Кондак 1

Избраннии чудотворцы и велиции угодницы Господни, града Мурома заступницы и приснии о душах наших молитвенницы, святии благовернии княже Петре и княгине Февроние! Пение похвальное вам приносяще, молим вы усердно: яко имущии дерзновение ко Господу, предстательством вашим от всяких бед нас свободите, и наследники Царствия Небеснаго нас соделайте, да зовем вам радостно:

Радуйтесь, святии и преславнии чудотворцы Петре и Февроние.

Икос 1

Ангели земнии и человецы небеснии воистинну явистесь, блаженнии Петре и Февроние, от юности вашей чистую совесть имущии и добре во благочестии и чистоте вкупе пожившии, нам же оставльшии в пример подражания житие ваше богоугодное, емуже чудящесь и чудесы вашими озаряеми, зовем вам гласы хвалебными сице:

Радуйтесь, от юности вашей Христа возлюбившии и Тому от души поработавшии; радуйтесь, целомудрия хранители и душевныя и телесныя чистоты рачители. Радуйтесь, души ваша и телеса на земли в обителище Духа Святаго уготовившии; радуйтесь, исполненнии премудрости и разума Божественнаго. Радуйтесь, яко во плоти, яко безплотни, вкупе пожисте; радуйтесь, яко

равноангельную честь достойне приясте. Радуйтесь, яко от земли на Небо преидосте и тамо со Ангелы Троице предстоите; радуйтесь, яко со безплотными лики трисвятую песнь Ей воспеваете. Радуйтесь, на Небеси и на земли от Господа прославленнии; радуйтесь, обретшии вечное всесветлое место упокоения. Радуйтесь, града Мурома сокровище пребогатое; радуйтесь, источники неистоцимии чудес.

Радуйтесь, святии и преславнии чудотворцы Петре и Февроние.

Кондак 2

Видев князь Петр в возвратной болезни своей, знамение гнева Божия, за неисполнение обета своего, пояти в супруги себе премудрую Февронию, потщася сие исполнити и сочетася с нею браком законным. Обаче и в супружестве целомудренно и богоугодно пожисте, блаженнии, имуще едину мысль во двою телу, еже благоугождати Богу; темже выну поете Ему ныне со Ангелы песнь: Аллилуиа.

Икос 2

Разумом богопросвещенным свыше одареннии, Петре и Февроние святии, любовь и милосердие к бедным и сирым яviste, обидимым и беспомощным заступници бысте и иными добродетельми многими украсисте княжение свое земное. Сего ради вопием к вам сице:

Радуйтесь, блаженнии и треблаженнии, в боголюбии пожившии и благоверие сохраниши; радуйтесь, милости и сострадания преисполненнии. Радуйтесь, беспомощных скории помощници; радуйтесь, печальных блазии утешители. Радуйтесь, сирот и вдовиц кормители; радуйтесь, сущих в бедах предстатели. Радуйтесь, болезней душевных и

телесных искуснии целители; радуйтесь, скорбных сердец радостотворнии посетители. Радуйтесь, любовь вашу к Богу, любовь к ближним своим показавшии; радуйтесь, княжение ваше земное праведно и богоугодно содержавшии. Радуйтесь, князей православных похвало и града Мурома утверждение; радуйтесь, всея земли Российская заступление.

Радуйтесь, святии и преславнии чудотворцы Петре и Февроние.

Кондак 3

Силою благодати Божия укрепляем, блаженне княже Петре, восхотел еси паче оставити град отечества твоего и княжение Муромское, неже бракоразвестися с премудрою Феврониею по настоянию гордых боляр твоих. Сего ради Бог тя прослави и сотвори, да теми же боляры возвращенный вкупе с супружницею твоею, на престоле княжения Муромскаго паки утвердился еси, нам же пример хранения закона Божия показуеши подвигом твоим, да подражая тебе в святости хранения союза брачнаго, воспеваем подвигоположнику Христу: Аллилуиа.

Икос 3

Имуще попечение о людех своих, преблаженнии Петре и Февроние, неусыпно подвизастесь ко благу их, благочестие насаждая, нечестие искореняя и вражду умиротворяя. Темже и Господь, видя таковыя подвиги ваша, землю Муромскую плодоносием благослови и мир глубок княжению вашему дарова, подвизая люди ваша благодарственно воспевати вам сице:

Радуйтесь, угодницы Божии, житию великих святых

сопричастницы; радуйтесь, правителие предобрии, люди Муромския ко спасению путеволившии. Радуйтесь, христианскаго благочестия блюстители; радуйтесь, нестроения, раздоров и всякаго нечестия искоренители. Радуйтесь, супругов христиан ко благочестному житию наставницы; радуйтесь, целомудрия и воздержания супружескаго образи преизящнии. Радуйтесь, праведнаго суда рачители; радуйтесь, немздоимства и безкорыстия ревнители. Радуйтесь, святых царей Константина и Елены добродетелей стяжатели; радуйтесь, равноапостольнаго князя Владимира и блаженныя княгини Ольги достойнии преемницы. Радуйтесь, двоице пречестная и благое сочетание, лучами чудес немерцаемо сияющии; радуйтесь, отечества вашего пресветлии светильницы.

Радуйтесь, святии и преславнии чудотворцы Петре и Февроние.

Кондак 4

Буря скорбей и напастей, воздвизаемая злобою мира сего, не ослаби крепкия любве вашей яже к Богу, Петре и Февроние блаженнии, но паче научи вас благоискусно отражати разжженныя стрелы искушений диавольских: вы бо оболкшеся в броню веры Христовы, в мире глубоце преидосте многомятежную пучину житейскаго моря, и достигосте в тихую пристань спасения, к нейже и нас молитвами вашими приведите, да вкупе с вами поем Богу: Аллилуиа.

Икос 4

Слышавше ближнии и дальнии благочестное житие ваше, благовернии Петре и Февроние, прославляху

человеколюбца Бога, даровавшего вам крепость на вся дела благая, имиже яко лучами пресветлыми, просиясте в отечестве вашем, идеже и доныне имена ваша честны, и подвиги ваша воспеваются похвалами сими:

Радуйтесь, двоице пресветлая, Богом совокупленная; радуйтесь, светом благочестнаго жития вашего, яко светила богосветлыя, просиявшии. Радуйтесь, милостынею и молитвами Небесное Царствие стяжавшии; радуйтесь, смирением и пощением вечное блаженство улучившии. Радуйтесь, яко мзда ваша многа на Небесех есть; радуйтесь, яко радость ваша вечна во светлостех святых. Радуйтесь, раби Христовы возлюбленнии; радуйтесь, святых всех приснии друзи. Радуйтесь, звезды непрелестнии, путь супружескаго жития богоугоднаго верно указующии; радуйтесь, облацы росоноснии, зной страстей и нечестия прогоняющии. Радуйтесь, Божиих милостей и щедрот нам податели; радуйтесь, Отечества вашего украшение неотъемлемое.

Радуйтесь, святии и преславнии чудотворцы Петре и Февроние.

Кондак 5

Богосвещеннии светильницы благочестия и предивнии чудотворцы Петре и Февроние, Бога от всея души возлюбивше, вся заповеди Его сохраните; темже и Христос, яко солнце и луну пресветлыя, показа вас, преблаженнии, чудес многих зарею озаряющия область Муромскую и всю страну Российскую, прославив нетлением святых и многоцелебных мощи ваша, к нимже припадающе, по достоянию ублажаем вас и выну благодарственно поем дивному во святых

Своих Богу: Аллилуиа.

Икос 5

Видевше житие ваше праведное и щедроты ваша, людие Муромстии славляху вас, своих правителей милостивых, благовернии Петре и Февроние, вы же смирение истинное возлюбивше и похвалы человеческия небрегше, гордынею неязвлени пребысте и тем покажете нам образ высшаго смирения, емуже поучаяся, с любовью вопием вам таковая:

Радуйтесь, славу человеку нивчтоже вменившии; радуйтесь, смирение Христово усердно возлюбившии. Радуйтесь, заповедей Господних вернии исполнители; радуйтесь, учения Евангельскаго истиннии последователи. Радуйтесь, раби Бога Вышняго, волю Его сотворшии; радуйтесь, веру Христову до конца соблюдшии. Радуйтесь, христоименитым людем благочестия учителя; радуйтесь, хотящих богоугодно жити богомудрии наставницы. Радуйтесь, молитвами вашими спасающии нас от всяких бед; радуйтесь, вся благая прошения наша исполняющии. Радуйтесь, в недузех страждущих благодатнии врачеве; радуйтесь, милостивии страны Муромския покровителие.

Радуйтесь, святии и преславнии чудотворцы Петре и Февроние.

Кондак 6

Проповедницы веры православныя и ревнители благочестия не словом токмо, но всем житием своим бысте во граде Муроме, прехвальнии Петре и Февроние; темже и Святая Церковь достойно почитает подвиги и труды ваша, имиже трудистесь во славу Бога Вышняго, немолчно воспевая Ему: Аллилуиа.

Икос 6

Возсиясте во граде Муроме светом добродетельнаго жития вашего, яко звезды богосветлыя, преблаженнии Петре и Февроние, и память ваша в нем с похвалами до днесь, яко и по смерти своей не престаете озаряти нас, многи чудесы совершающе и теми светлую зарю бессмертия нам от мощей ваших возсиявающе, да ублажаем вас благохвалении сицевыми:

Радуйтесь, чина и уставов Святыя Церкви вернии хранители; радуйтесь, служителей олтаря Господня благоговейнии почитатели. Радуйтесь, благих обычаев и преданий святоотеческих ревнители; радуйтесь, обычаев злых и суемудрий языческих искоренители. Радуйтесь, суды нелицеприятны людем вашим творившии; радуйтесь, суды ваша с милостию соединившии. Радуйтесь, кротцыи и незлобивии последователи Христовы; радуйтесь, злобу добром препобеждавшии. Радуйтесь, нетления благоухающи цветы; радуйтесь, бессмертия немерцающи лучи. Радуйтесь, на земли величием чудес блистающи; радуйтесь, на Небеси со Ангелы Бога славящи.

Радуйтесь, святии и преславнии чудотворцы Петре и Февроние.

Кондак 7

Хотяй Человеколюбец Господь явити в житии вашем, Петре и Февроние, образ назидания не токмо людем мирским, но и ликом иноческим, внуши вам в старости маститей оставити славу княжения земнаго, и восприяти образ иноческий, в немже подвизаетесь добре постом, бдением и молитвою, воспевая непрестанно Триединому Богу ангельскую песнь: Аллилуиа.

Икос 7

Новую благодать Божию во иночестем пострижении приемше, преподобнии, новыми подвигами украсисте равноангельное житие ваше и тако сугуб плод совершенства духовнаго Христу принесосте, и мзду преподобных достойне от Него восприясте. Поминая убо таковую ревность вашу к подвигом духовным, прославляем вас сими достодолжными похвалы:

Радуйтесь, яко любви ради Господа, мира сего княжение и славу остависте; радуйтесь, яко иноческое равноангельное житие усердно восприясте. Радуйтесь, совершеннаго терпения подвижницы; радуйтесь, вольныя нищеты блаженнии стяжатели. Радуйтесь, прежде кончины вашае вся страсти умертвившии воздержанием; радуйтесь, восприявшии святую схиму в броню спасения. Радуйтесь, багряницу княжескую на власяницу иноческую пременившии; радуйтесь, постом, бдением и непрестанными молитвами Богу добре угодившии. Радуйтесь, боголюбезнаго уединения взыскатели; радуйтесь, спасительнаго безмолвия любители. Радуйтесь, слезами молитвенными орошаеми; радуйтесь, в сонме преподобных на Небеси прославлении.

Радуйтесь, святии и преславнии чудотворцы Петре и Февроние.

Кондак 8

Странное и дивное бе чудо, егда ты, блаженне Петре, на кончине живота твоего, прошения ради супружницы твоея, святыя Февронии, исходом своим умедлил еси, дондеже сконча она пелену церковную, ею сшиваему и вкупе с тобою к исходу смертному приспе; и тако неразлучнии в житии, неразлучни и в

кончине явистесь, и во един день и час святых души своя в руце Божии предасте, зовуще присно живыми и мертвыми обладающему Владыце Богу: Аллилуиа.

Икос 8

Вси чудяхуся и славляху дивнаго во святых Своих Бога, егда святых ваша телеса, в разных гробех положенная, чудесно обретошася лежаща в общей гробнице, юже уготовасте себе, преподобнии, в соборней церкви града Мурома, идеже и доньше неразлучно почиваете, чудотворцы святии, неоскудная источающе исцеления всем, с верою прибегающим к вам и зовущим:

Радуйтеся, союз любве вашае до гроба и за гробом верно сохраншии; радуйтеся, не токмо в жизни, но и по смерти, о Господе соединеннии. Радуйтеся, в супружестве благочестием житии вам подражающим крепцыи помощницы; радуйтеся, теплотою любве вашае и нас согревающи. Радуйтеся, смертью временною прешедшии к жизни вечней; радуйтеся, от Господа нетлением и чудесы прославленнии. Радуйтеся, яко память ваша с похвалами и успение со святыми; радуйтеся, яко имена ваша честны суть и благословенны в отечестве вашем. Радуйтеся, Российския страны удобрение благодатное; радуйтеся, града Мурома ограждение несокрушимое. Радуйтеся, о любящих и чтущих вас небеснии предстатели; радуйтеся, приснопросящии нам у Господа дары благодати Его.

Радуйтеся, святии и преславнии чудотворцы Петре и Февроние.

Кондак 9

Вси Ангели и святых лики радовахуся радостию

велию, егда святыя души ваша достигоша вечнаго в обителех райских селения, и Сам Творец Ангелов и Святейший святых Царь Славы Христос, безсмертия венцы увенча вас и дарова вам благодать молитися Ему со дерзновением многим о всех ищущих вашего заступления, егоже не лишите и нас грешных, Петре и Февроние достохвальнии, смиренномудренно воспевающих прославльшему вас Богу хвалебную песнь: Аллилуиа.

Икос 9

Ветийство человеческое не довлеет к достойному прославлению дивнаго жития вашего, святии чудотворцы Петре и Февроние; кто бо исповесть вся мольбы и пощения, болезни и труды ваша; кто изочтет вся слезы и воздыхания ваша яже к Богу. Обаче мы, любовию к вам подвизаеми, дерзаем воспевати вам сия малыя и нехитростныя похвалы:

Радуйтеся, благодати Святаго Духа избраннии сосуди; радуйтеся, радости нам вечныя благоприятнии ходатаи. Радуйтеся, богобоязненных супругов в благочестии утверждение; радуйтеся, нарушителей супружескаго целомудрия и согласия грозное обличение. Радуйтеся, гнев Божий, праведно движимый на нас, молитвами вашими утешающий; радуйтеся, о мире всего мира непрестанно Господа умоляющий. Радуйтеся, на враги видимыя и невидимыя крепцыи нам споборницы; радуйтеся, ангелонравнии человецы. Радуйтеся, преподобных и праведных сонаследницы; радуйтеся, Пресвятая Троицы вернии угодницы. Радуйтеся, блаженнии обитатели града Иерусалима Небеснаго; радуйтеся, со святыми торжествующии в скиниях райских.

Радуйтесь, святии и преславнии чудотворцы Петре и Февроние.

Кондак 10

Спасение вечное унаследовавше богоблаженнии Петре и Февроние, душами вашими в обителях горних неразлучно в Бозе пребываете, святыми же мощами вашими в храме Божиим нетленно вкупе почиваете, и обильныя исцеления источаете, да чудесы вашими благодатно озаряеми, хвалебно взываем Верховному Творцу чудес Богу: Аллилуиа.

Икос 10

Стену заступления, благоприятныя молитвы ваша к Богу, обретше, святии чудотворцы Петре и Февроние, благодарение Отцу Небесному усердно возсылаем за вся благодеяния Его, вами всем нам обильно являемя, вам же, предстателям нашим, сицевое приносим пение:

Радуйтесь, всесветлаго Царствия Христова наследницы; радуйтесь, ангельских ликов собеседницы. Радуйтесь, Бога во славе неприступней созерцающи; радуйтесь, Трисияннаго Божества таинницы. Радуйтесь, со святыми на Небеси вечно царствующи; радуйтесь, от горних высот к земнородным милостивно приникающи. Радуйтесь, крини благоуханнии небеснаго прозябения; радуйтесь, кипариси чудоточнии рая Иисусова. Радуйтесь, податели независтнии безмезднаго врачевания; радуйтесь, совершители достохвальнии многих чудес. Радуйтесь, благодеяний множество нам источающи; радуйтесь, милостию сострадания вашего всех объемлющи.

Радуйтесь, святии и преславнии чудотворцы Петре и

Февроние.

Кондак 11

Пение молебное приносим вам, угодницы Божии Петре и Февроние, и с любовью припадаем к раце святых и многоцелебных мощей ваших, прославляя житие ваше богоугодное и подвиги многи. Молимся вам усердно, чудотворцы святии, помозите нам подражати вашим добродетелем, да возможем богоугодно пети Создателю нашему: Аллилуиа.

Икос 11

Света небеснаго исполнен бе соборный храм града Мурома, егда благоволением Божиим святыя мощи ваша, Петре и Февроние, целы и благоуханны обретошася в нем, и из недр земных, яко сокровище драгоценное, изнесены быша, идеже и до ныне почивают, исцеления неоскудныя источающе недужным и болящим. Сего ради песненно вопием к вам:

Радуйтесь, злато нетленное, в недрах земных обретенное; радуйтесь, бисери сияющи и благодатно просвещающи человеков. Радуйтесь, Святыя Православныя Церкви похвало; радуйтесь, ересей и расколов обличение. Радуйтесь, свети умнии, зарю Святаго Духа облистающи; радуйтесь, мира благоухания Христова преисполненнии. Радуйтесь, облеченнии в ризу в благодатного нетления; радуйтесь, препоясаннии силою многих чудес. Радуйтесь, яко рака ваша честная лечебница явися недугом человеческим; радуйтесь, яко от нея всяк с верою приходяй дары целебныя приемлет. Радуйтесь, светлостию чудес ваших мрак душ наших озаряющи; радуйтесь, нетлением святых мощей ваших зарю

общаго всех воскресения нам показующии.

Радуйтесь, святии и преславнии чудотворцы Петре и Февроние.

Кондак 12

Благодать свыше вам дарованную, познавше, святии чудотворцы Петре и Февроние, с благоговением и любовью покланяемся нетленным и многоцелебным мощем вашим и от них приемлем в недузех исцеление, в скорбех утешение, в бедах благодатную помощь; темже и прославляем вас по достоянию, небесных предстателей и заступников наших, воспевая хвалы и благодарения вами благодворящему нам Владыце Богу: Аллилуиа.

Икос 12

Поюще многая и преславная ваша чудеса, велиции угодницы Божии Петре и Февроние, ублажаем вас, яко целителей, утешителей и помощников от Господа нам дарованных, и молитвенно торжествуем святую память вашу, от любве сердечныя воспевая вам благодарственно и хвалебно:

Радуйтесь, во благоухании святыни нетленно почивающии; радуйтесь, с верою приходящих к раце мощей ваших благодатно освящающии. Радуйтесь, призывающих молитвенно честная имена ваша скории услышатели; радуйтесь, упование на вас по Бозе возлагающих дивнии помощницы. Радуйтесь, известнии умилоствители Царя Небеснаго; радуйтесь, сильнии защитницы наши от врагов невидимых. Радуйтесь, приснии всем нам ходатаи спасения; радуйтесь, неотступнии хранители града Мурома. Радуйтесь, князей российских пречудная доброто; радуйтесь, отечества вашего Богом

дарованныи покровители. Радуйтесь, телес наших благодатнии целебницы; радуйтесь, о душах наших усерднии ко Господу молитвенницы.

Радуйтесь, святии и преславнии чудотворцы Петре и Февроние.

Кондак 13

О святии и преславнии чудотворцы, благовернии княже Петре и княгине Февроние! Приимите милостивно сие похвальное пение от нас недостойных во умилении вам приносимое, и вашим предстательством у Господа испросите нам утверждение в вере и добрых делах, и избавление от всех скорбей и болезней временных и вечных, да сподобимся вкупе с вами и всеми святыми во Царствии Небеснем пети Пресвятей Троице вечно хвалебную песнь: Аллилуиа.

(Этот кондак читается трижды, затем икос 1 и кондак 1)

Икос 1

Ангели земнии и человецы небеснии воистинну явистесь, блаженнии Петре и Февроние, от юности ваша чистую совесть имущии и добре во благочестии и чистоте вкупе пожившии, нам же оставльшии в пример подражания житие ваше богоугодное, емуже чудящесь и чудеса вашими озаряеми, зовем вам гласы хвалебными сице:

Радуйтесь, от юности ваша Христа возлюбившии и Тому от души поработавшии; радуйтесь, целомудрия хранители и душевныя и телесныя чистоты рачители. Радуйтесь, души ваша и тела на земли в обителище Духа Святаго уготовившии; радуйтесь, исполненнии премудрости и разума Божественнаго. Радуйтесь, яко во плоти, яко безплотни, вкупе пожисте; радуйтесь, яко

равноангельную честь достойне приясте. Радуйтесь, яко от земли на Небо преидосте и тамо со Ангелы Троице предстоите; радуйтесь, яко со безплотными лики трисвятую песнь Ей воспеваете. Радуйтесь, на Небеси и на земли от Господа прославленнии; радуйтесь, обретшии вечное всесветлое место упокоения. Радуйтесь, града Мурома сокровище пребогатое; радуйтесь, источники неистоцимии чудес.

Радуйтесь, святии и преславнии чудотворцы Петре и Февроние.

Кондак 1

Избраннии чудотворцы и велиции угодницы Господни, града Мурома заступницы и приснии о душах наших молитвенницы, святии благовернии княже Петре и княгине Февроние! Пение похвальное вам приносяще, молим вы усердно: яко имущии дерзновение ко Господу, предстательством вашим от всяких бед нас свободите, и наследники Царствия Небеснаго нас соделайте, да зовем вам радостно:

Радуйтесь, святии и преславнии чудотворцы Петре и Февроние.

Молитва

О велиции угодницы Божии и предивнии чудотворцы, благовернии княже Петре и княгине Февроние, града Мурома предстатели и хранители, и о всех нас усерднии ко Господу молитвенницы! К вам прибегаем и вам молимся с упованием крепким: принесите за нас грешных святыя молитвы ваша ко Господу Богу и испросите нам у благости Его вся благопотребная душам и телесем нашим: веру праву, надежду благу, любовь нелицемерну, благочестие непоколебимое, в добрых делах преуспеяние, мира

умирение, земли плодоносие, воздуха
благорастворение, душам и телесем здравие и вечное
спасение. Исходатайствуйте у Царя Небеснаго державе
Российстей мир, тишину и благоустроение, и всем нам
житие благополучное и добрую христианскую кончину.
Оградите отечество ваше, град Муром, и вся грады
Российския от всякаго зла и вся правоверныя люди, к
вам приходящия и мощем покланяющияся, осените
благодатным действием благоприятных молитв ваших,
и вся прошения их во благо исполните. Ей, чудотворцы
святии! Не презрите молитв наших, со умилением вам
возносимых, но будьте о нас приснии предстатели ко
Господу и сподобите нас помощью вашею святою
спасение вечное получитьи и Царствие Небесное
унаследовати, да славословим неизреченное
человеколюбие Отца, и Сына, и Святаго Духа, в
Троице покланяемаго Бога, во веки веков. Аминь.